

佛說檀持羅麻油述經

東晉西域三藏竺曇無蘭譯

佛在摩竭國因沙壇山中時佛子羅云隨佛在山中羅云夜卧爲鬼神所燒驚起明日至佛所爲佛作礼却在一樹下坐羅云以手扶頰伍頭不樂嘿然不語佛即問羅云何以伍頭如鬼怖狀羅云言我昨日夜卧爲鬼神所燒佛語羅云天下或生人燒人或山神燒人或道溝邊鬼神燒人或善死鬼神燒人來欲試人經道恐人欲知其心堅軟佛語羅云汝取佛辟鬼神呪後儻有鬼神來燒汝者持是鬼神名字以慈心說之

阿波竭 證證竭 無多薩 惜遲比遲
沾波沾 波迦羅准 維陵無 因輪無
指輪無 僫沙無 因登羅 宋林羅
和林羅 波耶越羅 檀持羅

佛言是檀持羅經佛故爲諸弟子結恩經佛說是經時日月尚有墮地佛語終不有異今佛說是檀持羅經以說生人欲來燒人者不得燒人山神亦不得燒人道溝邊鬼神亦不得燒人腥死鬼神亦不得燒人善死鬼神亦不得燒人聞是語火爲不然食飯得毒毒爲不行欲殺人刀爲不向溺深水中爲不沒難群有四子人行空閑處若行縣邑中大國中若對會若大坐中耆老中伴侶中步行中坐卧中值有盡道家者向讀是經盡道爲不行佛即爲羅云說使羅云爲諸比丘比丘尼優婆塞優婆夷及諸白衣皆令諷誦之

佛說檀持羅麻油經